



GOVERNMENT OF NIUE

FAKAILOAAGA MAHUIGA

KUA FAKAMONUINA E FALE FONO II MA E TAU OHI A NIUE

Kua poaki foki he Fakatufono, ko e aho 27 he mahina Mē to eke mo taha Aho Okioki pauaki he motu, ke fakamanatu aki e Fakamonuinaaga he Fale Fono Foou a Niue

Alofi, Niue - 27 Mē 2022 – Kua fakailoa he Fakatufono Niue e fakamonuinaaga ha Fale Fono II ke he taha fakamanatuaga faiagahau ke fakamailoga e Fale Fono foou he Fono Ekepule a Niue, i Halamahaga, Alofi he aho nei, 27 Mē 2022.

Kua talahau he Palemia a Niue, Lilifu Dalton Tagelagi, ko e fakakatoatoaaga he matagahua tālaga he Fale Fono II ko e gahua mahuiga lahi ma e motu ko Niue, tali mai he fakauluaga he Fale Fono fakamua he Fono Ekepule a Niue, he tau 1978.

Ne pe hē a Palemia Tagelagi, “Kua fiafia lahi e Fakatufono Niue ha kua mau e Fale Fono, ke lata mo e ononoaga ki mua he Lilifu kua mole atu ko Sir Toke Tufukia Talagi, mo e tau Hātaki Fono fakamua oti, ko e tau Ikipule, ko e tau Ekepule mo e tau kaugahua ne fuhiulu auloa ke kautū hohoko e mau maopoopo he kaina foou nai. Ko e taha koloa taoga tokiofa a Fale Fono II, kua foaki ai ma e tau ohi ha Niue. Kua lahi foki e mahuiga e kaina nai, ha kua maeke ke vevehe e Faahi fakagahuahua he Fakatufono mai he Faahi ne tālaga mo e fakamooli e tau matafakatufono, ke munitua ke he tau fakatokaaga he Fakatufono Tohi Fakavē; mo e kua eke foki e tauteaga nai mo taha lakaaga ma e tau tala tū fakaholo a Niue.”

Kua talahau foki e Palemia, Lilifu Tagelagi, kua fakaaue lahi mahaki e motu ko Niue ke he tau lagomatai loga, mua atu ke he Fakatufono Niu Silani, tau Fakatufono he falu motu tata mai he atu Pasifika mo e tau matakau kehekehe.

Ne pe hē a ia, “Kua to lahi e fakaaue ke he Fakatufono Niu Silani ke he koloa fakalofa noa nai, ti fakaaue foki ke he Fakatufono Ausetalia, Fakatufono Iapana, mo e Fakatufono he motu ko Saina, pihia foki e tau fakaaue ke he tau kaugahua kehekehe, ne tukumoeulu mo e eketaha ke mau maopoopo e kaina nai, pete he loga e e tau paleko ne fakafehagai he omai he hala, tuga e gagao COVID he lalolagi.

Ko e fakaholoaga ma e fakauluaga he Fale Fono to kamata aki e futiaga he matini he Kautū, to fakamatala folafola foki e Hātaki Fono he Fono Ekepule, Lilifu Hima Takelesi, ko e liogiaga fakamonuina he kaina mai he Faifeau Navy Salatielu, mumuituaga he hehele he kapihi, mo e veveteaga he lapa maka ka veveu he Lilifu Dalton Tagelagi, Hukui he Fakatufono Niu Silani i Niue, HE Helen Tunnah, pihia foki mo Lady Fifita Talagi.

Ne talahau e Palemia, Lilifu Dalton Tagelagi, ka oti e fakaholoaga fakamua ne putoia ai e taha Fonoaga pauaki he Fono Ekepule a Niue, to oatu e tau Ikipule, tau Ekepule mo lautolu oti ne fakalataha mai ke he taonaga, ke he taha fakafiafiaaga ke lata mo e tau tagata oti he motu.



GOVERNMENT OF NIUE

Kua fakafitā e tau tagata i Niue ke he taha galue fafau, ko e galue pauaki he ha faiagahau he motu, ke fakamailoga mo e fakatūnavē e kaina foou, ko e faiagahau nai he motu.

“Ko e Galue Fafau, ko e galue lahi mai he tau fua he fonua, kua fakatātā pauaki e tau fua mai he fonua a Niue, tuga e talo. Ne fai Galue Fafau pihia ne fakamailoga aki e fakauluaga he Fale Fono fakamua he tau 1978.”

FAKAOTIAGA

GON Official Facebook: <https://www.facebook.com/niue.secgov>

GON Website: <https://www.gov.nu/>